

Naqqiut

Matumuuna akissuteqaat 11. november 2020-meersoq taarserneqarpoq

Aningaasalersorneqarsimasunik aallakaatitassianik nutaarsiassanik, maannarpiarlu soqutiginarturnik imallit tusagassiuutit aallakaatitsisinnaanngornissaat anguniarlugu inatsimmut atuuttumut allannguutissatut siunnersuuteqarnissamut Naalackersuisut peqquneqarnissaannik Inatsisartut aalajangiiffigisassaattut siunnersuut. Aallakaatitassianik nutaarsiassanik, maannarpiarlu soqutiginarturnik imallit aningaasalersorneqarsimanerat, aningaasaliinermut tunngaviusimasoq suungaluarpalluunniit, aallakaatitsinnginnermi tunisisup kinaassusaanik takutitsisumik nalunaarutigineqartarnissaa piumasaqaataassaaq.

(Demokraatit Inatsisartuniitsitaat)

Akissuteqaat

(Ilinniartitaanermut, Kultureqarnermut Ilageeqarnermullu Naalackersuisoq)

Siullermeerneqarnera

Naalackersuisut Demokraatit inatsisartuni gruppiata siunnersuuteqarnerannut qujapput. Radiukkut tv-kkullu aallakaatitsisarneq pillugu Inatsisartut Inatsisaat nr. 7, 8. juni 2014-imeersumi § 48, imm. 6-imi aamma Radiumi tv-milu pilerisaarutit aallakaatitassianillu aningaasalersuisarnerit pillugit Namminersornerullutik Oqartussat nalunaarutaanni nr. 8, 5. juli 2006-imeersumi § 28 malillugit nutaarsiassanik massakkullu pisunut aallakaatitassianik aningaasalersorneqartunik aallakaatitsineq inerteqqutaavoq.

Malittarisassat massakkut atuuttut malillugit radioqarfiit tv-qarfiillu aningaasaliisartut atorlugit isertitativit killeqanngitsumik ilasinnaavaat, soorlu assersuutigalugu nunanut allanut angalatitsinermut, tamakkulu nutaarsiassanut massakkullu pisunut aallakaatitassianut ilaanngippata taamaaliortoqarsinnaavoq. Allatut oqaatigalugu aningaasaliisarneq aallakaatitassianut allanut tamanut atorneqarsinnaavoq, taamaallaat nutaarsiassanut massakkullu pisunut aallakaatitassianut pinnani.

Aalajangersakkamut tunngavigineqartoq pillugu § 48, imm. 6-imi nassuiaatini atuarneqarsinnaavoq nutaarsiassat aamma massakkut pisunut aallakaatitassiat aningaasalersornissaannut inerteqquteqartitsineq, aallakaatitassianut tamakkununga immikkut ittumik kiffaanngissuseqarnermut taamaalillunilu nutaarsiassiissarnerup uppernassusianut apeqqusiisoqarsinnaannginnissaq tunngavilersuutigineqarpoq. Tamatumunnga pissutaavoq nutaarsiassaartitsivik nutaarsiassalerinermut atatillugu piviusorsiuunngitsumik ilanngussisutut isorineqalersinnaammat, assersuutigalugu aningaasaliisup soqutigisaanut iluaqutaasussamik eqqartuisoqartillugu. Soorlu tamanut inatsisini akulerussinnaatitaanermut pissutsit aallaavigalugit suliffeqarfiup sunnerneqarsinnaannginnerata apeqquserneqarnissaata isorineqarnissaanut tunngavissaqartoq.

Taassuma saniatigut ilimagineqarpoq aningaasaliisup maluginiartassagaa aningaasaliineq immikkut ittumik nutaarsiassanik tusagassiorneq salliutinneqarnissaanut periarfissat annertusissasut, aaqqissuisoqarfik kiffaanngissuseqaraluarpalluunniit. Assersuutigalugu piffinniit assigiinngitsuniit ilanngutassiisernerit pillugit isummersortoqarnerani piffiup angalanernut najugaqarnernullu aningaasaliiffigineqartup pingaartinneqarnerunissaanut salliutitsisinnaaneq akerlileruminaassinnaavoq.

Ilanngullugu oqaatigissallugu pingaaruteqarpoq assersuutigalugu KNR-ip nammineq aamma innuttaasut nutaarsiassaqarfimmut tassunga kinaassusersiunngitsumut tatiginninnerannut oqaatiginnittutut aalajangersagaq isigisariaqarmat. KNR-imut tunngatillugu oqaatigineqassaaq KNR tassaammat Kalaallit Nunaanni nuna tamakkerlugu innuttaasunut aallakaatitsivittut kisimiilluni kiffartuussiviusoq, taamaammallu aallakaatitsisarfiup tatiginassusaanut piomasagaatit sakkortunerummata. Taamaattoqarmallu innuttaasunut aallakaatitsivittut kiffartuussiviunerani kiffaanngissuseqarnerup tatiginassutsillu apeqquserneqassannginnerat pingaartorujussuuvoq.

Siunnersuuteqartup erseqqissarsimavaa nutaarsiassat massakkullu pisunut aallakaatitassiornerit aningaasaliiffiginissaannut inerteqquteqartitsinerup atorunnaarnissaa pillugu siunnersuuteqarnermi piomasarineqassasoq aallakaatitassiap aallartinnissaa sioqqullugu aallakaatitassiap kimit aningaasalersorneqarnera paasissutissiissutigineqartassasoq, apeqqutaanani aningaasaliinermi suna tunngavigineqarneris siunertaanersorluunniit. Naalakkersuisut isumaqataapput tamanna ammasumik ingerlatsinermik malitseqarumaartoq taamatullu inatsimmi maanna atuuttumi mianerisassanut naammassinnittoqarsinnaassalluni.

Naalakkersuisut tamatuma saniatigut aamma isumaqarput radio tv-lu pillugit inatsimmi aalajangersakkat allanngortinnissaat pillugit siunnersuutit soqutigisallit attuumassutillit peqatigalugit eqqartorneqartariaqartut, radioqarfiit tv-qarfiillu peqatigalugit. Tassunga atatillugu aamma pingaartuuvoq pitsaasunik sinaakkusersuiarnissarput ukkatarissagatsigu. Tamanna KNR-imuinnaq tunngassanngilaq kisiannili sumiiffinni radioqarfiit tv-qarfinnut annertoqataanik tunngassalluni.

Tamanna tunngavigalugu Naalakkersuisut innersuutigissavaat siunnersuut akuersaarneqassasoq.